

**Uunga siunnersuut: Feriarneq pillugu Inatsisartut inatsisaata allanngortinneqarnera pillugu Inatsisartut inatsisaat nr. xx, xx. xxx 2020-imeersoq** (Aningaasaqarnermut Naalakkersuisoq)

**Saqqummiussissut**

(Aningaasaqarnermut Naalakkersuisoq)

**Siullermeerneqarnera**

Naalakkersuisut sinnerlugit matumuuna feriarneq pillugu Inatsisartut inatsisaata allanngortinneqarnissaanut siunnersuut saqqummiutissavara.

Feriarneq pillugu inatsisip allanngortinneqarnissaanut siunnersuutigineqartumut siunertaavoq, nunatsinni soraarnerussutisianut aaqqissuussinermut akiliisoqarnersoq imaluunniit nunani allani soraarnerussutisianut aaqqissuussinermut akiliisoqarnersoq apeqqutaatinnagu, soraarnerussutisianut aaqqissuussinernut feriarnersiutinik aamma immikkut ittumik feriarnersiutinik naatsorsuinnermut tunngavissat assigiissasut.

Feriarneq pillugu inatsimmi § 16, imm. 1 naapertorlugu feriarnersiutinik aamma immikkut ittumik feriarnersiutinik naatsorsuinnermi akissarsianut tapiliussat taamaattut imaluunniit akissarsiat ilaat isertitatut akileraaruteqaataasussaangitsut taamaattut, ilanngunneqartussaangillat. Taamaattoq sulisitsisoq sulisartup soraarnerussutisianut aaqqissuussinermut il.il. akiliutaanit feriarnersiuteqartitsisarpoq aammalu immikkut ittumik feriarnersiuteqartitsisarluni.

Aningaasarsianit akileraarutit pillugit Inatsisartut inatsisaata allanngortinneqarneranik Inatsisartut inatsisaat nr. 7, 6. juni 2016-imeersumi nunani allani soraarnerussutisianut aaqqissuussinerit akileraaruteqaataasussaangorput, taamaattumik aamma nunani allani soraarnerussutisianut aaqqissuussinernut akiliutinit feriarnersiutinik maannakkut akiliisoqartartussaangorluni. Kisiannili nunatsinni soraarnerussutisianut aaqqissuussinernut akiliutinit feriarnersiutinut imaluunniit immikkut ittumik feriarnersiutinut akiliisoqartussaananani. Tamanna tulluannigilaq aammalu siunertaangitsumik assigiinngisitsinerulluni.

Siunnersuummi assigiinngisitsineq taanna atorunnaarsinneqarpoq. Tamanna feriarneq pillugu inatsimmi ilanngussinikkut pivoq, taamaalilluni soraarnerussutisianut aaqqissuussinermut, soraarnerussutisianut aningaasaateqarfimmi imaluunniit aningaaserivimmi, Kalaallit Nunaanni angerlarsimaffeqartuunngitsumi imaluunniit aalajangersimasumik ingerlatsiveqanngitsumi ilanngutsinneqartumut sulisitsisup akiliutaannit feriarnersiutinik aamma immikkut ittumik feriarnersiutinik akiliisoqartarunnaassalluni.

Siunnersuummi feriarneq pillugu inatsimmut tunngatillugu sulisartut assigiimmik inissisimatinneqalissapput. Sulisartut nunatsinni soraarnerussutisianut aaqqissuussisimasut tamatuma kingorna, sulisartut nunani allani soraarnerussutisianut aaqqissuussisimasut assigalugit, feriarnersiutinut aamma immikkut ittumik feriarnersiutinut naatsorsuinermi tunngavissat assinginik atugassaqartinneqalissapput. Taamaalilluni siunnersuutip kingunerisaanik inatsisitigut inissisimaneq ulloq 1. januar 2017 sioqqullugu atuuttoq, aammalu sukkulluunniit allangortinneqarnissaa kissaatigineqarsimanngitsoq, uterfigineqassaaq.

Naggataatigut inatsisissatut siunnersuut aammalu nassuiaatitai innersuussutigissavakka.

Taamatut oqaaseqarlunga Naalackersuisut sinnerlugit siunnersuut Inatsisartuni kajumittumik suliassanngortippara.